

Herencia cultural di Aruba for di Museo Etnologico di Leiden

Despues di mas cu 120 aña nan ta na cas bek!



DESPUES di hopi negociacion porfin 5 obheto arqueologico di Aruba, cu ta den coleccion di Museo Etnologico na Leiden ya for di final di siglo 19, ta bek na Aruba.

Cu ayudo financiero di UNOCA y Ministerio di Cultura a crea facilidadnan pa e obhetonan aki y a trece nan bek cas. Nan ta ser exponi den e exposicion permanente nobo di museo y por ser admira pa tur bishitante local y internacional.

Museo Arqueologico Nacional Aruba a traha durante lunanan largo cu e Museo Etnologico di Leiden pa sigura cu e obhetonan ta ser transporta na un manera sigur y cu una vez den museo condicionnan ta apto pa nan permanencia y conservacion. Director di Coleccionnan na e museo di Leiden, Sr. Greame Scott a viaha hunto cu e obhetonan y a instala esakinan den nan respectivo vitrinanan.

Dos di e obhetonan ta data for di e periodo 900/1000 – 1515, pues e periodo Ceramico. E canica cu figura di cara humano a ser exponi pa varios aña na e entrada di e Museo Etnologico di Leiden, e ta un di e piezanan mas espectacular di nos herencia arqueologico.

E otro obheto Ceramico, ta un figurina completo cu ta hol paden y cu a ser usa durante ceremonia y ritualnan.

Tres calbas, probablemente di e periodo Historico, pues despues di 1515, ta mostra e maestria pa arte decorativo cu

habitantenan di nos isla tabata tin den e periodo entre 1515-1880. Tur e obhetonan aki a ser colecciona pa Pater van Koolwijk, kende den un esfuerzo pa conserva nan a manda nan museo na Leiden mas cu 120



aña pasa.

Awe Museo Arqueologico Nacional Aruba ta trece nan cas bek pa henter nos comunidad por admira y yuda conserva nan. Museo Arqueologico Nacional Aruba ta habri tur dia menos dialuna di 10 'or di mainta pa 5'or di atardi.

